



S Nun diser gefiert planus abgestolen fertig ist/ als daß stell den würffel darauf an sein stat zu gleicher weys wie er dann hie foren auf sein abgestolen plano stet. Das zu machen sind also. Nym die leng von einer seitten des würffels im forderen niedergedruckten grund/vñ setz die mittlen mit zweyen puncten. x. y. auf die vnderen zwerchlini. f. g. deiner ysigem abgestolnen stierung/ in den weitten von dem eck. f. so weit sie stet im forderen niedergedruckten grund/ von der seiten des gefierten plano. e. f. Darnach zeuch zwey streymlini auß dem naheren aug in die zwen puncten. x. y. zwischen dise zwey lini muß der würffel mit seyner vnderen stierung hinden auf disen planus gestellt werden. Aber wie weyt hinder sich / das such also / So du in dem forderen niedergedruckten grund ein ortstrich. e. g. reißt/ so wirt auch diser ortstrich eyn ortstrich im niedergedruckten grund des würffels sein/ dann dise lini get durch seine zwey eck. 1. a. vñnd. 2. c. Nun so das ist/ so zeuch auch ein ortlini. e. g. in deinem ysigem abgestolnem feld/ wo daß dise durchschneyt die zwey streymlini. x. y. da setz auß der lini. x. ein. a. vñd auß der lini. y. ein. c. Darnach zeuch zwey zwerchlini auß den puncten. a. c. wo dann die zwerchlini. a. durchschneydet die streymlini. y. da setz ein. d. Aber wo die zwerchlini. c. die streymlini. x. durchschneydet / da setz ein. b. also stet der gefiert planus vñden an dem würffel mit sein vier ecken recht auf dem gefierten abgestolnen plano. e. f. g. h. wie da foren in dem anderen.

Nun zeuch auß den vier ecken. a. b. c. d. vber sich vier aufrecht lini/ vñnd die forderen zwey zeuch so hoch vber sich als lang da ist die zwerchlini. b. c. vñ zeuch oben in vorgemelter höhe ein zwerchlini von einer lini zu der andern/ vñ setz in die selben zwey eck ob dem. b. die ziffer. 2. vñd ob dem. c. die ziffer. 3. Darnach zeuch zwey streymlinien auß dem nehern aug in die zwey eck. 2. 3. wo sie daß abschneiden a. d. da setz ob dem. a. die ziffer. 1. vñd ob dem. d. setz. 4. vñd zeuch ein zwerchlini. i. 4. vñ. 2. 3. Also ist diser würffel recht gemacht/ wie in dem forigen abgestolnen grund. Wie ich dann das hienach also hab außgerissen. Et ich weiter gehē.

